

GAUR AURKEZTUKO DUEN GOBERNUAREN OSAKETA ERABAT SEKRETUPEAN GORDE DU

PP, CiU eta CCren botoekin Espainiako presidente hautatu dute Aznar

■ Kongresuko bozketan, Jose Maria Aznarrek aldeko 202 boto eta aurkako 148 jaso ditu

■ Inbestidura saioaren azken egunean, Talde Mistoaren kritikak entzun ditu lehendakariak

■ Gobernu berriari dagokionez gauza ziur bakarra da Abel Matutes ez dela egongo



Jose Maria Aznar, eserita, PPko bere taldekideen txaloak jasotzen, bigarren aldiz Espainiako presidente hautatua izan ondoren.

J.J.GUILLEN / EFE

Erredakzioa / Donostia

JOSE MARIA AZNAR beste lau urterako hautatu zuten atzo Espainiako Gobernuako presidente. Kongresuko bozketan, 202 diputatuk egin zuten PPko lehendakariaren alde —PP, CiU eta CC Koalizio Kanariarrekoak— eta beste 148ek aurkako botoa eman zuten —PSOE, IU, EAJ eta Talde Mistokoa—.

Ez zen inolako ustekaberik izan, bezperatik jakina baitzen erregionalista kanariarrek ez ezik CiUko nazionalista katalanek ere, musutruk, Aznarren aldeko botoa emango zutela. Aznarrek eskertu egin zituen bi talde horien botoak. Luisa Fernanda Rudi Kongresuko presidentek bozketaren emaitzaren berri ematean, PPko diputatuak zutitu egin ziren eta txalo zaparrada beroa jo zioten Aznarri.

Espainiako presidentek karguaren zina egingo du gaur Juan Carlos I.a Espai-

niako Erregearen aurrean. Arratsaldean aurkeztuko du bere bigarren Gobernu. Aznarrek erabat sekretupean gorde du zeintzuk izango diren ministroak eta, hortaz, Espainiako politikagintza jarraitzen duten kazetariak espekulazioak besterik ezin izan dituzte egin.

Gauza ziur bakarra da Abel Matutesek ez duela Atzerri Ministerioan jarraituko, bere borondatez politika utziko baitu negozioetara itzultzeko. Pentsatzekoa da Rodrigo Ratok jarraituko duela Ekonomia ministro eta lehendakariorde izaten eta Jaime Mayor Oreja Barne ministro izango dela aurrerantzean ere. Mayorrek berak onartu zuen atzo goizean gaiari buruzko elkarrizketarik ez zuela izan Aznarrekin.

Aipatu izan denez, Francisco Alvarez Cascosek ez du lehendakariordetzan jarraituko, baina litekeena da ministerio bat egokitzea, Sustapena esaterako.

Josep Pique Industria ministroak ere ziur aski leku garrantzitsua izango du exekutibo berrian, Mariano

Raxoi Hezkuntza ministroak bezalaxe. Bi horiek Aznarren oso gustukoak dira, baina Piquek zenbait arazo ditu justiziarekin, Ercros auzia dela-eta. Rafael Arias Salgadok ez luke Sustapen Ministerioan jarraituko, baina ministro izango da

ko, bera izan baita ministro guztien artean kritika gogorrenak entzun behar izan dituen, Madrilgo eta Bartzelonako aireportuetako kaosak tarteko.

Pentsatzekoa da Federico Trillo ministro izango dela,

Aznarrek Kongresuko lehendakariatzat baztertu zuela beste kargu baten promesa eginda. Defentsa edo Justizia izan daitezke bere karterak.

Talde Mistoaren kritikak

Inbestidura saioaren bigarren egunean, Aznarrek Talde Mistoan bildutako alderdi nazionalisten kritika gogorak entzun behar izan zituen.

BNG Bloke Nazionalista Galiziarreko Francisco Rodriguezek salatu zuenez, PPren pribatizazioei esker oligopolioak eratu dira telekomunikazioetan, energian, bankan eta garraioetan.

Joan Puigercos ERCko diputatuak kritikatu zuen PPren Gobernu Madrilen inbertitzen ari dela Kataluniaren kaltetan.

Chunta Aragonesistaren (CHA) izenean, Jose Antonio Labordetak autogobernua eskatu zuen Aragoirentzat.

Kataluniako Parlamentuak ez du eutanasia legeztatzea eskatuko

■ Bi botoko aldeaz bota zuten atzera ERCren proposamena

Agentziak / Bartzelona

KATALUNIAKO Parlamentuak atzera bota zuen atzo eutanasia aktiboaren aldeko legegai bat. ERCK aurkeztu zuen proposamena eta haren bidez eskatzen zitzaion Espainiako Diputatuen Kongresuari eutanasia aurrerantzean delitu ez izatea. Kataluniak ez du ezkuduntzarik Espainiako Kode Penala aldatzeko.

Emitza oso estua izan zen eta bi bozketa behar izan ziren erabakia hartze- lo. Izan ere, lehen bozketan 66 diputatuk egin zuten alde, beste hainbatek aurka eta bat abstenitu egin zen. Bigarren bozketan, berriz, aldeko 66 izan ziren eta aurkako 68. Bozketa sekretua izan arren, talde diziplina nagusitu zen: CiUk eta PPk aurka egin zuten eta alde ERCK, PSCK eta ICK.

Jaume Camps CiUko bozeramaileak ziurtatu zuen ezin zuela bere kontzientziaren arabera botoa eman, bere iritziz, eutanasiari buruzko bozketa «kutsatuta» zegoelako. Joan Ridao bozeramaile independentistak atzera bota zuen argudio hori eta iragarri zuen berriro eramango dutela gaia Parlamentura. IC aurreratu zaie, Esquerraren proposamena ia hitzez hitz berriro aurkeztu baitzuen. 1998an Kataluniako parlamentarioek errefusatu egin zuten eskaera.

Eutanasia munduan

Munduan zehar Holanda da eutanasia aktiboa onartzen duen herrialde independente bakarra, hau da, ez duena zigortzen bere buruaz beste egin nahi duen gaixoari laguntza ematea. Legerik ez dagoen arren, Holandako Auzitegi Goreneko 1984ko epai batek babesa ematen die zenbait kasutan eutanasia aktiboan parte hartu dutenei. Australiako Iparraldeko Lurraldeak, berriz, 1995az geroztik onartzen du sendagileek hiltzen laguntzea hala nahi duten gaixoei.